



“FAITAU TUSI TAPU KAE ‘TALO I ASO KATO’A”

ULU O TE MASINA: “SE A TAU FAKATOKAGA ‘MO TE ATUA, E ALA I TENA TAMA KO IESU KELISO E TELA KO TENA TAMA NE LIUTINO ONA KO TATOU?”

Ulu o te Vaiaso: “E alofa mai kae alofa atu”

Aso Gafua: 01/07/2019

Tusi Faitau: Isaia 6: 1- 9

Fuaiupu Filifilia; 8: *“Tena la, kae lagona ei ne au a muna a te Aliko penei, Ko oi te tino ka uga atu ne au? Ko oi ka fai mo avefekau a tatou? Ne tali atu au, Ko au! Uga mai au!”*

Ulu o te aso: “Tali atu ki te alofa o te Atua mo koe mo au i aso katoa o tou olaga”

Ko au! Uga mai au! Ko fakamunaga a te tagata ko ofo tena ola, se tagata e tela ko malie katoatoa tena loto ke tuku atu a tena ola ke fai mo ave fekau a te Atua. Isaia se tasi o Pelofeta e kese a tona kalagina mai i Pelofeta a te Atua katoa. Aua me i te ave a Isaia mo tagata a te Atua ne mafua mai i te ofo, ona ko mea ne kilo a ona mata ki ei. E se gata i te kilo o ona mata, kae ko molimau foki e iloa ne ia ki ona mata a te ‘mana mo te fakamataku o te Atua Tolu Tasi Tapu. Kae mai i te ofo o tena loto mo tena mataku, ne fakalagi ake ei ne ia ana muna. Ko au! Uga mai au! Ko lagona o te loto fia tali atu ki te kalaga a te Atua, aua se kalaga e sala me ko oi kafai mo avefekau? Ne seki tualima ne Isaia, e ui te fakama’taku o mea ne lavea ne ia, kae seki fakavaivai a tena loto, kae atili lagona ei ne ia te malosia o tali atu ki tena Atua.

Te olaga e olagina ne tatou, e uke a mea fakafoofogia ne fai ne te Atua ki tou olaga, kae ne seki mafai e iloa ne tatou o tali atu, tenei au! Uga mai au! E uke foki a ona alofaaga mo ana fakamanuiaga ki tou olaga kae ne seki mafai e iloa ne tatou o tali atu ki tena alofa. Sei vagana ko afatia te olaga, ftoa iloa ei ne tatou o fakatagi atu ‘mo se fesoasoani mai i te Atua. Kalofa i lagona o te tagata ola, ne lagona kola e manako faeloa ke tali ne ia a fakamanuiaga mai i te Atua kae e se mafai ne ia o toe fakatoka atu se tali e agai ei te alofa o te Atua. Iesu Keliso ko te Tama liutino a te Atua, tela ne vau i se auala maualalo, kae ne seki tali alolima ne te tagata, ne mate kae seki lagona foki ei ne te tagata ola te taua o tena mate, kae ne seki tualima mai tatou ne te Atua ki tena alofa atafai. Ko tena uiga, ola o tali atu a tena alofa, e ala i te alofa mai kae alofa atu, e tali atu ei koe, tenei au! Uga mai au!

Aso Lua; 02/07/2019

Tusi Faitau: Iona 2: 1- 10

Fuaiupu Filifilia; 2: *“Te Alikī, i toku puapuaga ne kalaga atu ei au ki a koe, kae ne tali mai koe ki au. Mai lalo i te lalolagi o tino mate, ne tagi au ki se fesoasoani, kae ne lagona ne koe.”*

Ulu o te aso: “Sa ola o sola, kae ola o tali atu”

Te kalaga a te Atua ki tena tavini ko Iona, se kalaga o se manakoga ko te mea ke mafai o fakaoko atu te Tala ‘lei ki Nineva, kae mai i te alofa mo te manakoga o te Atua tenei, kae ne seki talia ne Iona ko ia ke fano ki Nineva, ne manatu ake ei a ia ko ia ke sola, mo ona fakamoemoega, ke ‘mao a ia mai i te Atua. Ko puli ia Iona me i te manakoga o te Atua ‘mo Nineva, ko tena alofa tena ki tino o Nineva, ko te mea ke mafai o iloa ne Nineva o ola matakū kae fakatuanaki atu ki a Ia. Kae maimau te alofa o te Atua, aua me ia Iona ne seki manako ko ia ke fano. Lagona o te tagata kaiu mana fakasoa atu a tala iloga o tena Atua ki Nineva, e se gata i kona, e seki manako foki a Iona ko ia ke fano aua me ia Nineva ko te laumua o Asulia tela ko te fili mate o Isalaelu. Konei a fakamuamuaga a te toeaina ko Iona, kae maimau ei te alofa fakatoka o te Atua ki olaga se toka o Nineva. Sola i ona manatu me ka ‘mao a ia mo te Atua, sola ke lilo a ia i mata o te Atua, kae fai mai te fuaiupu filifilia o te taeao tenei. *“Te Alikī, i toku puapuaga ne kalaga atu ei au ki a koe, kae ne tali mai koe ki au. Mai lalo i te lalolagi o tino mate, ne tagi au ki se fesoasoani, kae ne lagona ne koe.”* Ko ‘gana o te tagata ko lagona te faatauva, lagona tena se mafai, kae manatua ei ne ia a tona Atua i ona puapuaga.

Tenei tonu te ata o te tagata i tena natula, ko te ola o faite se vasia ‘mao o ia mo te Atua. Se natula e aofaga faeloa ko ia ke sola keatea mai i te Atua mo tena kalaga alofa, kae e tenei a tena ikuga, ko te faatauva mo te feagai mo fakalavelave e uke o te olaga. Tela la, sa ola o sola keatea mo te Atua, kae ola o tali atu ki tena alofa kalaga mai ki a koe mo au, kae ka fakaeagina ei koe ne tena alofa, sa sola ke ‘mao koe mai i te Atua, e amo ei ne koe a faigata mo puapuaga e uke, kae masiasi ei te olaga. Iesu Keliso i tena ala ki te ulu mauga o Kalevalia, ne seki sola, kae ne agai ‘tu ne ia, ne iloga ei a Ia ko te tautai fakaola o te lalolagi katoa.

Aso Tolu: 03/07/2019

Tusi Faitau: Fakaasiga 2: 1-7

Fuaiupu Filifilia; 4: *“Kae tenei eiloa te mea ko se malie ei au ki a koe, i a koe ko se alofa mai nei ki a au, e pela mo tou alofa i te kamataga.”*

Ulu o te aso: “Sa fakatafa tou alofa mai i te Atua kae fakanafa atu”

Te toaina ko Ioane, ko taumafai o tala atu ki Efeso a se fekau e toe fagu ki ei a latou ke mo a fulitua a latou ki te Atua. E se ko te fulitua kae ko te alofa mo te fakamaoni o latou ki te Atua ke mo a e fuli. Efeso se koga fakai iloga kae takutakua i ko’ga fenua o asia Foliki (Turkey) i vaitaimi o te malo o Loma. A tona takutakua e mafua mai i tena maumea mo tena taulaga vaka. Ko tena uiga, kafai e tenei te takutakua o Efeso ona ko tena maumea, tena uiga, se laukele e sologina ne tino valevale ona ko te maumea. Kae mai i te uke o tagata e solo atu ki ona laukele, ko te uke foki kona o talaiga kesekese mo talaiga fou ki te lotou Fenua. Kae mai i te uke o talaiga fou konei, ne mafuli ei te ola tavini tapuaki o latou ki te Atua e pela eiloa mo taimi mua. I konei, ko taumafai a Ioane o fagu kae fakamanatu atu ki a Efeso, me e tefea a tena alofa fakamaoni ki te Atua i aso mua? Aua me ko se malie te Atua, me ia Efeso ko se fakamaoni ki tena alofa muamua ki te Atua, e tela ne fakavae ki ei a olaga o ona tino. Ko tena uiga Efeso ko fakatafa a tena alofa, ko mamasagia a tena alofa, se taumate ko tai gali atu a fai’ga tapuakiga fou konei. Ko tena uiga te alofa o te Efeso ki te Atua ko kamata o matafitafi. Kae maimau la te manuia o fanau, aua me ko fulitua te Efeso ki te alofa fakatoka o te Atua mo ona laukele.

Te fekau fakamanatu a Ioane i te taeao tenei, tumau tou alofa, aua me i te alofa o te Atua e tumau mo taua ki te se gata mai. E alofa mai kae alofaaatu, ko tena uiga, sa fakatafa tou alofa, kae sili ke fakanafa atu, e tali ei ne fanau a te katoaga o ana fakamanuiaga. Iesu Keliso ko te katoatoaga o te alofa tuku mai a te Atua, ne mate, ne fakalumalumagina, kae ne seki fakatafa ne ia a tona alofa kae fakanafa eiloa ne ia te mae mo te mafa o tau sataulo ne ‘fau, ko te mea ke ola taua o tali a ana fakamanuiaga e ala i tena alofa.

Aso Fa: 04/07/2019

Tusi Faitau: Kenese 22: 3- 9

Fuaiupu Filifilia; 8: *“Ne tali atu a Apelaamo, “Ko te Atua e aumai ne ia.” Tena, sasale fakatasi atu eiloa laua ki te koga tena e olo laua ki ei.”*

Ulu o te aso: “Ko te tali o te mautinoa mo te iloa tonu.”

Te mautinoa mo te iloa tonu e aumai ne ia te ‘toka mo te se sapolepole ki te tagata. Aua me i te mautinoa tonu ko te tali a se tagata ko masani kae ko apo foki i te faiva. A te tautai apo, e se sona fano ki te moana, kae fano me ko iloa ne ia te koga e taloa ei te vaka. Te fesili ne faka fesiligia ne Isaako ki a Apelaamo, se fesili e faigata, aua me ko nofo fale ia Apelaamo a te mafuaga mo te pogai o te la malaga. Kae ne tali ne Apelaamo, ko te Atua e aumai ne ia. Te tali a te Tamana ne ola i se olaga mautinoa i tena ‘va ki tena Atua. Se tali e tela e se fakalotolotolua, kae ne tali mo te mautinoa, me ko te Atua ka fakatoka ne ia. Tenei te ata o te tagata kooti ne fakatalitonu ne ia a te alofa o te Atua mo ia i tena olaga, te tagata e tela kooti ne molimau ne ia te alofa fakatoka o te Atua. Ne seki poi a Apelaamo, ne seki fakafoki foki ne ia te manakoga o te Atua, aua me i te loto mautonu mo te iloa tonu o ia ki te Atua, se pine fakamau tena i tena olaga tautua ki te Atua.

Ko Apelaamo i tena olaga mautonu, ko Apelaamo foki i tona olaga iloa tonu, tela ne fakavae mai i tena ola molimau ki faiga fakatoka a te Atua ki aso tausaga o tena olaga, ne tali atu ei a ia ki te fesili faigata a tena tama ko Isaako ana muna, “Ko te Atua e aumai ne ia.” Kaea mai taua i te taeao tenei? Sea nei a tau tali atu ki tau fanau? Tali i te tali a Apelaamo, se tali o te mautinoa mo te iloa tonu, ona ko tena olaga tavini ki tena Atua, tela kooti ne iloa ne ia me i te Atua e tapuaki a ia ki ei, se Atua e ola kae alofa. Konei a fuataga o te tagata ola mafuta o tali atu ki te Atua, te tagata e alofagia ne te Atua, kae e alofaatu foki ki te Atua, ne seki poi kae ne mautinoa tonu ia ia. Kae ne fakatoka eiloa ne te Atua te tama mamoe e fai ei te taulaga. Iesu Keliso ko te mamoe liutino a te Atua e tela ne vau ke fai mo taulaga fakaola ki a koe mo au, ko te mea ke ola taua o mautonu kae iloa tonu a tena alofa atu ki a Ia.

Aso Lima: 05/07/2019

Tusi Faitau: Kenese 45: 4- 11

Fuaiupu Filifilia; 8: *“Tela la, e se ko koutou ne aumai ne koutou a au ki konei, kae ko te Atua. Ne fai ne ia a au mo ofisa maluga eiloa a te tupu. Au e pule i tena fenua katoa, au ko te takitaki o Aikupito katoa.”*

Ulu o te aso: “Ko toe fakatoka ne te Atua te alofa fakataina”

Iosefa te tama fai moemiti a te kaiga, tela ne fakatau atu ne ona taina ona ko te ‘loto masei o ona taina. Ko galo te mafutaga faka kaiga faka taina aua me i faiva o te lotu masei ko faite ne ia se vanu i vasia o Iosefa mo ona taina. Te fakatau atu o Iosefa, se fakamoemoega ko te mea ke se toe mafai o maua se avanoaga e toe lavea ei a ia ne ona taina. Ko tonu a lagona o ona taina kae puli i ona taina te alofa fakatoka o te Atua tela ka toe sauni ei latou ‘mo se avanoaga i se aso, e toe faite ei te sokoga fakataina faka kaiga o latou mo Iosefa. Te taeao tenei, muna Iosefa ki ona taina, *“E se ko koutou ne aumai ne koutou a au ki konei, kae ko te Atua. Ne fai ne ia a au mo ofisa maluga eiloa a te tupu. Au e pule i tena fenua katoa, au ko te takitaki o Aikupito.”* Ko tena uiga, te fakatau atu o Iosefa, se fakatokaga a te Atua, ‘mo tau o te oge, e toe fakatoka ei ne ia te mafutaga faka taina i lotu i te vasia o Iosefa mo ona taina. I konei ko atagia ei ia tatou te natula alofa o te Atua, tela e se tau ma sui, kae se alofa e toe fakatoka ei se mafutaga ne motusia, e ala i ana faiga alofa. Ko tena uiga, e ita mai kae alofa atu, i konei ko mafai ei o atagia ia tatou a tena fakatokaga e ala i a Iesu Keliso, tela ne ita ki ei a tagata o te lalolagi nei, ne faka sataulogina, ne kini, ne puapuakigina, kae ne tau ne ia ki tena alofa fakamagalo, e ala i tena mate mo tena toetu.

Sea la nei a tau fakavasegaaga ki te fakatoka gali kae matagofie a te Atua tenei? E mata e mafai ne koe mo au o aofaga a alofaaga ‘mo se tino e tela ne fakatau atu ne ia koe? E faigata ki a taua, kae sili ke iloa ne taua o tuku atu ki te Atua ke fakatoka ne ia se avanoaga, e tau atu ei ne koe te masei ki te alofaatu, e pela mo te Atua ne alofa mai o tuku mai a tena Tama ko Iesu Keliso, ke ola ei taua, tena uiga, ola o tau atu a mea ki te ‘lei, kae sa ola o lamalama a tou taina mo tuakoi, e fakalofa ei te Atua i uiga fai o tatou.

Aso Ono: 06/07/2019

Tusi Faitau: Kenese 47: 27- 31

Fuaiupu Filifilia; 30: *“Au e manako ke tanu au i te koga e tanu ei toku Tamana mo oku tupuga, ave eiloa au keatea mo Aikupito, o tanu i te koga e tanu ei latou.”*

Ulu o te aso: “Te laukele ne fakavae ei te olaga talitonu ki te Atua”

Iakopo e tela ne fakaigoagina ne te Atua ko Isalaelu, ko tauanau a tena fakamoemoega e ala i tena manakoga ko i a ke tanu i te koga ne tanu ei a tona tamana mo ona tupuga. Kae ko te fesili, kaea Aikupito? Te tagata ne ola kae teu i tena loto a muna tapu o ona tupuga, se tagata ne ola i te olaga kae moe fakalava i tena loto a te laukele ne foafoa ei a tena ola talitonu kae fakatuanaki ki te Atua, e ala i ona tupuga. E setioa la o taulagi te toaina ko Iakopo ki laukele ne tanu ei a ona tupuga ke fai mo ona alaafaga tumau. Te naunauga o Iakopo, se naunauga ne fakavae mai i te feagaiga o te laukele e tela ne fakatoka ne te Atua ‘mo Isalaelu, me se laukele ka sofī mai ei te susu mo te hani, tela ko te manuia. Konei foki a lagona o te toaina ko Apelaamo e ala i tena manakoga, ko te mea ke ‘sala eiloa se avaga ma tena tama i fafine o tena fenua. Kae a Iosefa i tena manakoga ki ana tama tagata, se manakoga foki ko i a ke ave eiloa o tanu i te fenua o te feagaiga ko Kanana. Ko loto mo putinae o tagata kola ne ola kae ne lavea ne latou a te alofa fakatoka a te Atua e ala i olotou tupuga. E ui ko’ga laukele maumea ko ola latou i ei, kae naunau eiloa te loto ki laukele ne fakavae mai ei te olaga talitonu ki te Atua.

Ko fia nei laukele fou kola ko taulagi ki ei a Tuvalu i te vaitaimi nei? Ko laukele konei kola ko fulitua ei a tamafanau a te atufenua, ki laukele o fakamanuiaga o olotou tupuga. Ko tualimagina ne latou a tuku’ga muna kola ne fakavae ki ei a te lotou olaga talitonu ki te Atua ona ko poto o aso nei, kae kalofa te Atua mo ona fakatokaga kola ne maimoa ki ei a ou tupuga mo oku tupuga. Kalevalia ko te laukele tela e tau o naunau a taua ke tanu taua i ei, aua me ko Kalevalia ne fakatoka ei ne te Atua te manuia i te ola e se gata mai mo koe mo au. Ke maua ei ne taua a ana fakamanuiaga i te ola e se gata mai.

Aso Sa: 07/07/209

Tusi Faitau: Iopu 2: 1- 10

Fuaiupu filifilia; 10: *“Ne tali atu a Iopu penei, “Ko oko eiloa i tou valea mo au pati kona e fai! Kafai e aumai ne te Aliko ne mea lei ki a tatou, e talia ne tatou mo te fiafia. Ai a la e mauimui ei tatou manafai e aumai ne ia a puapuaga? E ui eiloa i te uke o puapuaga ne oko ki a Iopu, kae e seki ai eiloa se muna masei ne fai ne Iopu ki te Atua.”*

Ulu o te aso: “Sa fakamasino te Atua i ana fakatokaga mo koe, me i tena alofa e tumau eiloa mo koe.”

Iopu se tagata tela ne lasi o ola i se olaga puapuagatia kae fakaalofa i fakamaumauga o te Tusi Tapu. Se tagata ne ola i se olaga maumea kae fakaaloologia. Se tagata ne fakamaoni kae matakū ki te Atua, kae i te taimi ne tofotofogia ei a ia, ne oko ei a tena olaga ki te ‘mae mo te fakaalofa. Kae mai i ona maega, ne seki mafai eiloa ne Iopu o muna masei ki te Atua, kae ne fakaasi eiloa ne ia a tona mae mo tona fakaalofa e ala i ana muna, fakamalaia aka a te aso ne fanau ei au, muna ‘tuku atu a te po ne fanau mai ei au. I konei e lavea ne tatou te faigata mo te ‘mae ne oko ki a Iopu. Kae mai vaega taua ko fia aumaigna i te taeao tenei, muamua, ko te loto malosi o Iopu. E ‘mae, e tigaina, e fakalofa, kae ola te ‘ava o Iopu ki te Atua, ko tena uiga, se tagata e mautaki ki te Atua e ala i se fakamoemoega fou. Eiloa ne Iopu me e vau taimi e laofie ei te vaiua o ona fitaga mo ona mafatiaga, eiloa foki ne Iopu, me i te po e fano o malama, kae ka fakatoka ne te Atua se taeao fou o tona olaga. Ne seki fakamasino ne ia a tona Atua, kae ne talitonu a Iopu me i te Atua se Atua e alofa, kae ko tena alofa e tumau faeloa ki te se gata mai. *Ana muna, “kafai e aumai ne te Aliko ne mea lei ki a tatou, e talia ne tatou. Ai a la e mauimui ei tatou manafai e aumai ne ia a puapuaga?”* Te ata o te tagata e malie fua, te tagata e talia fua ne ia a sose fakatokaga a te Atua ki tena olaga, aua me iloa ne Iopu me se ko te kamataga kae ko tena fakaotiga e taua. Taua i te taeao tenei, sa fakamasinosinogina ne taua a te Atua e ala i ana fakatokaga mo taua i aso takitasi o tou olaga, kae sili ke lagona ne taua a lagona faka Iopu, me e se ko te kamataga kae ko te fakaotiga, sa fiu gofie, ko fulitua ei koe, sa ‘mae gofie, ko fakatafa ei koe mo te Atua e ala i tena Ekalesia, kae onosai, malie i sose mea, aua e sae aka a mata o te la o te aso fou, ka maimoa ei koe ki te alofa fakatoka o te Atua mo koe. Iesu Keliso ne seki fakamasino ne ia taua i te mae o fao a tatou ne tuki, mo te faigata o te tao ne velo ne taua, kae fakakii ne ia, aua tena alofa ke molimau ne taua manafai ko laofie te vaiua, manafai ko sae aka mata o te la o te aso fou, kae ke ola ei taua i te ola e se gata mai.

Ulu o te Vaiaso: “Sea tau alaga e fakalaga iei te kaiga, fenua mote Ekalesia.”

Aso Gafua: 08/07/2019.

Tusi faitau: Esoto 2.1-6.

Fuaiupu Filifilia; 3: *“Ite taimi ko se mafai iei neia o funa ate Tamaliki, puke iei neia te ato kome, ponopono neia ki pulukau, ke se mama, kae tuku ei neia te pepe ki loto.”*

Ulu ote aso: “Tonu te aofaga, maua te kai-fakasilia.”

E tasi o mea faigaluega tela e fua kiei te natula ote Tagata, i tena takapili mo tena gasue, kote AOFAGA. I loto ite Tusi tapu, e toko-tolu a tupu ne aofaga kite tamatega o tamaliki. Kote Tupu ko Faalao. Kote Tupu fafine ko Atalia [2Tupu 11].mote Tupu ko Helota i vai tau ne fanau iei Iesu Keliso. Kafai e kilo tatou kia latou konei, ko takitaki o fenua, kola e fakaiku-mata kiei a Tino, ke aofaga mai ne latou te manuia, mote filemu iloto ite sosaiete, kae tela la e aofaga fua kite masei mote mate, to gase la a moe matua Epelu, kae pula fetu ote lagi pena foki o pula te Matua o Mose, sala kise aofaga, e maua iei te ola.sala me takato i fea te fakatokaga ate Alike mo tena kaiga. Te ATO KOMI, kote kai fakasilia, ote matua, se mea tau lima, se kope taua ote fale, ko au mai mo faka sao te ola ote fanau. Se aofaga e lavea iei me ko sopoia, nete matua te tulafono ke tamate a tamaliki tagata. Te tulafono ne gaosi mai ite loto masei, se aofaga ne fakatoka nete matua e fakasi iei te fai mea mafai ote Atua o Isalaelu, ko manakogina ne matua fai aofaga lei, aofaga e fakalaga iei kaiga, fenua mai-se te Ekalesia. te galuega ko oge i lagona mo manatu ote fai aofaga lei. aofaga e maua iei te ola ite foitino mote Agaga. kae ko maumea tatou i aofaga e lepetia iei te olaga kausaki mo-se taeao fou ote olaga. ne fakaoga nete matua te KO TAA, e ponopono iei ke se mama, ke se pala ite vai tafe, kae se kaina foki te ato kome ne manu ote vai tafe. kote ata manino ote tiute kalagagina o tatou kote ponoponoga koga mama mo koga masei ote vaka iloto i kaiaga, fenua pena foki te galuega ate Atua, auala i tou aofaga lei. Iesu Keliso e aofaga faeloa kite manuia ote Tagata, ne mate kae toetu ke maua ne tatou ate ola.

Aso Lua: 9/07/2019

Tusi Faitau: 2 samuelu 20; 15-19.

Fuaiupu filifilia.19: *“A te mo tou fakai lasi se fakai filemu kae fakamaoni, iluga Isalaelu, kaia taumafai iei koe o fakamasei ate motou fakai.”*

Ulu ote aso: **“Sa ofa kae ati.”**

E fakavae te tala, iluga ite tagata, ko Seepa, tela ne faifai muna kae teke kite tupu o Isalaelu ko Tavita, sola iei a Seepa o fakalafi ite fakai ko Apelu Peta maka. Ne sala nete kautau a Tavita, tela e takitaki ne Ioapo, te aofaga ke ulu latou ki loto ite fakai, ke KELI mai lalo ite pui ote fakai, ko ana fakamoemoega, ke tatela io me fati ki lalo te pui ote fakai. Te aofaga ke keli te pui mai lalo ke fati, se kiloga ote tagata e fakalagolago ki tena malosi, e aunoa mo se alofa ki tino. Te keli ote pui ote fakai se faifaiga tela ko olo tasi mote fakamaualuga mote takafiatoa, se uiga ote tagata kosu fenua kae loto fika. Matai o kaiga, nofo kae masaua faeloa ne koe mo au, i ta kaiga ese nofo fealofani faeloa i aso katoa, e isi ne taimi ko lagona ne taua, mei ite PUI OTE KAIGA, ko galulu....kae fatio ifo taua....ko taa fanau ko keli a pui ote kaiga ke tatela ki lalo. I nisi o taimi ko taua foki loa tamana mo matua e keli ne taua ke galulu a pui ote kaiga. Te EKT ko lauiloa ana pui, mo ana tusaga ne faka-failelegina iei te Atu-fenua tenei. mai te olaga pouliuli kite mainaga ote Talalei, ko pui ote EKT ne malu iei te Atu-fenua, I ana kausakiga mo ana fakamoemoega,ko uke foki a Ioapo ko taumafai o keli a pui ke tatela ki lalo, a pui o tou loto talitonu, ko pokotia a pui ote olaga tautua mote olaga tavini, ko fakafesiligina, kafai ko tupu a fakalavelave ko kamata o galulu a pui ote kaiga, fenua mote galuega, sili ate fesili mai te fakai o Apelu, ate motou fakai lasi, se fakai filemu kae fakamaoni iluga i Isalaelu, kaia e taumafai iei koe o fakamasei ate motou fakai, e sili te fealofani mote lei ...ilo te keli pui ke tatela ki lalo. Te mate o Iesu, seki mafua ona kote keli pui ke fati ki lalo, ikai ne mate ke maua te ola.

Aso Tolu: 10/06/2019.

Tusi faitau: 2 Tupu 3; 4-8

Fuaiupu Filifilia; 8: *“Tefea te auala ka olo iei tatou kite taua, ne tali atu Iolamo, tatou e olo ite auala loa.”*

Ulu ote aso: **“Fakauta te loto malosi, aua te malaga e loa.”**

Te fakavae ote tala, kote se togiga ote lafoga ate tupu o moapi ko Mesa ki Isalaelu, ite tupu ko Iolamo, ne sala feasoasoani iei kite tupu ko Iosefatu. Te foiupu filifilia, ko muna ilalo ite malae, tefea te auala ka olo iei tatou kite taua, ne tali iei te Tupu ko Iolamo, tatou e olo ite auala loa, kaia ese olo iei ite auala toetoe. Te Malaga faka-Esoto kite fenua ko kanana ne ui iloto ite auala loa, ne Malaga iloto i faigataga mo fuifaiga, kote ata lavea o sose kausakiga, e iai a faigata oia, kae kote fekau mo tatou, fakauta te foitino kite loto malosi, napenape te foitino kite loto fai ki mua, te malaga loa e lavea iei ne tatou te fakatokaga ate Atua, ki tou olaga, mo mea tupu i aso takitasi, ko auala ote Aliko e iai faeloa ne avanoaga mote tagata. Tasi o pogai ne tali iei te Tupu, tatou e olo ite auala loa, te tina sotia tonu e lavea fua ana foliga tonu, manafai ko fakafeagai mo faigataga mo maega ote olaga. E se mafai o tala nese sotia, a tala ote taua, manafai seki, tu te sotia i lalo i malae tau. Tatou e faimalaga iloto ite malaga loa, tela e uke ana fiufaiga, mo ana tauliaga, ke moa tatou e loto vaivai, te tina kelisiano e iloa fua ite olaga TAUTUA mote olaga TAVINI. Iesu keliso ne tumau te loto malosi ke oko kite sataulo, te auala toetoe, e fakamatala iei te faigofie, ese manakogina la ke fai tatou mo kelisiano e ola ise olaga, seai se olaga mae i tusaga fai, fakauta te foitino kite loto malosi.

Aso Fa: 11/06/2019

Tusi Faitau: 2 Nofogatupu 20; 35-37.

Fuaiupu filifilia: 36: *“Ne faite o la fuavaka.....fuaiupu 37.....kae ne kasa o la vaka.”*

Ulu ote aso: **“E fakalaga pefea ne koe te vaka ote ekalesia, fenua.”**

E mailoga a tufuga mo oltou toki. kae sose kausakiga e folau iei te vaka ote tagata, e tasi te fakamoemoega ke ake ki matafaga ote manuia. Te Tupu ko Iosefatu mote Tupu ko Asaia, ko tufuga faite vaka o Isalaelu mo Iuta, auala i la aofaga mo atiakega, ke oko ki taupulega ke maua se taeao fou mote olaga. Kae tala mai te tusi tala, ne faite o la fuavaka ke fauta mai iei koloa mo aualo, siliva, kae ne kasa seki oko, te koga tenei ne folau kiei a vaka-mutu konei, ne ave foki kiei a vaka ate Tupu ko Tavita, kae ne oko, te fesili kaia ne oko iei a vaka Tavita kae kasa vaka Iosefatu mo Asaia, ona ne fakavae o la fuavaka ki manuia mo laua e iloa, manuia e penefiti iei laua, kae ke takutakua foki laua, konei a kiloga e lavea iei te seai se alofa. Fanau lotu ite aso tenei, e isi se pogai ne aumai iei nete Aliko te ola kia koe mo au kote fakalaga ne koe te olaga ki mea lei kae aoga. Taua ko tufuga faite vaka iloto ite kaiga, auala i tou tiute faka-tamana mo matua ite akoako, taua

ko tufuga fakanagina ote ekalesia, kola e tausii ne taua ate lafumamoe ate Atua.e molimau ne tatou, vaka folau faka-tauavaga ko kasa, ko mavae, i loto ite ekalesia, pefea te folauga ote vaka, ite vasia ote galuega mote lafumamoe, I loto ite kaitasi, i loto ite taufanauga, kae pefea te folauga ote fakatuanaki, nea au mea fai galuega e fakaaoga mo toe talai kiei te vaka. Sa talaigina ki lagona faka Iosefatu, mo kiloga faka Asaia, kae au mai a tugatoki ote tufuga o tufuga, ko Iesu Keliso, toki ote alofa mote galuega, te faimeatonu, fakamaoni, te loto-fakamagalo, e folau iei te vaka, fakalagolago ki auala ote Alikii, kilo kite vaka o Iesu, ne oko kite sataulo ne folau ite mautinoa, se tiao o maua te manumalo.

Aso Lima: 12/06/2019.

Tusi faitau: Kenese 32; 3-8.

Fuaiupu filifilia, 4: *“Ka ko Esau ne tele atu o fakafetaui kia ia, sai atu kae sogi atu kia ia ,tagi iei laua tokolua.”*

Ulu ote aso: **“Sea tau alaga ki loto ite fakalavelave.”**

Te muna alaga, e vau ite pati ALA, kote alatu, io kote auala, e pela mo muna a tou Alikii ko Iesu, te auala kite takitaki, kote ola tavini. Ko fakavae te tala, i se tautaina kola ne tupu aka i tafa o matua mo tamana, ne ola fealofani, ke oko kite taimi, ne nofo vasia iei laua ona kote fakamanuiaga ne puke ne Iakopo. Te fakatokaga a Iakopo ke fai se vasia lei o laua mo Esau, ne vaevae neia ki potukau, a ana tavini, ana manu, ke oko ki ana avaga mo ana tamaliki, kae nofo ise vasia tai mao. Se alaga ote loto maulalo ke maua te manumalo, se fakatokaga ke maua se mafutaga fiafia kae ola fealofani. Te auala ko fakaoga ne Iakopo, e avaka neia te olaga fai fili ki ou taina, tuagane, e seai se manuia e maua iei, te olaga tutaua, kae ola lamalama, kote ata ote tagata, e mao mote Atua, se tagata e se iloa neia ite alofa ote Atua e lava kae toe mo ia. Ko uke nei a fakalavelave e feagai mo tatou i aso nei, e manakogina ne Iakopo, i loto ite atu-fenua, e nofo manavase faeloa kite ola fakatau-alofa, ote sosaieti. Fanau ate Atua, kae sea nei tau alaga e fakatoka iei ne koe a fakalavelave. I loto ite kaiga, fenua, ko koga galue. Te alaga a Iesu Keliso kite sataulo, ne malaga ite loto filemu kae loto maulalo, ne fakalogo kae loto kufaki, se alaga ote olaga tavini, se alaga e fakasi iei tena alofa kite tagata ke maua te ola.

Aso Ono: 13/06/2019.

Tusi faitau: Isaia 49; 14-16.

Fuaiupu Filifilia; 16: *“Ielusalema ese mafai o fakapuli ne au koe, koti ne tusi ne au tou igoa i toku alofilima.”*

Ulu o te aso: “Ko alofi-lima alofa o te Atua.”

I manatu o te Isalaelu, me ko tuku tiakina mai latou nete Atua, se vaitau o te ola fameo kae manatu ifo, ite Atua ko se alofa mai, ona ko puapuaga ko feagai mo latou, te olga mae kae fita, se vaitau o te seai se fakamoemoega ite tagata Isalaelu, ona kote nofo pologa i. Papelonía. ko fakafesili iei ne latou te alofa ata-fai tama o te Atua muna te Atua, Ielusalema, ese mafai ne au o faka-puli koe, ko oti ne tusi ne au tou igoa i toku alofilima. Ko lagi o te tamana fai tama lei, tela seki faka-tamala loa tena tautua mote manuia o Isalaelu. Muna te Atua Isalaelu, konei alofi-lima ne tausi iei koe, ke mailoga koe ite lalolagi, konei alofilima ne sao iei koe mai ou fili, ko alofilima foki o te Atua, ne ola manuia iei Tuvalu, ne puti ake neia Tuvalu ke isi ne ana tala fakasolopito, fanau ate Atua, fakamalo ki alofilima faite kaiga, kae atiake fenua ki luga. Tausi te malo ki alofilima o te taupulega lei. Tausi te Ekalesia ki alofilima o te alofa tonu kite galuega mote faimeatonu. E oi te igoa iluga i tou alofilima. Pefea te mafanafana o te kaiga i ou alofilima. Ko alofilima o Iesu Keliso kola ne tuki ki fao, ne sali mai iei te TOTO o te fakamagaloga o agasala tela ne fakaola iei te tagata.

Ulu o te vaiaso: “Ke mailoga tou alofa ki te Alikí.”

Aso Gafua: 15/07/2019

Tusi faitau: Iona 1:1-6

Fuaiupu filifilia; 6: *“E to pefea tau moe? Tu ki luga o talo ki tou atua ki se fesoasoani. Se taumate kaati ka alofa mai o fakasao tatou.”*

Ulu o te aso: “ALA, TU KI LUGA.”

Te agaga o te tusi o te aso nei, ko te tala o te faguuga o Iona ke tu ki luga, aua te fakalavelave ko tupu, kae ko te mea ko manakogina, ke talo ki tena Atua mo se fesoasoani, aua te fakalavelave ko fakafeagai mo te faigaa malaga. I te tala e fai mai, ne maua atu ne latou a Iona e to tena moe, tela

fagu atu ei ke tu ki luga, muna a te kapeni, e to pefea tau moa, mo te fakalavelave tenei ko tupu ki te malaga, tu ki luga o talo ki tou Atua, e se taumate ka fesoasoani mai kia tatou. Ko manakogina a Iona ke ala ki luga o fai tena tusaga, aua te taimi faigata ko oko kiei a te faiga malaga. I loto i te fakalavelave tenei, e iloa lei faeloa ne Iopu te pogai o te fakalavelave tenei, e pogai mai i a ia, ona e iloa ko te teke ne ia te fakatonuga a te Atua, tela ko se fano a ia ki Nineva e pela mo te manakoga o te Atua, kae ko tele ki Sepania ke mao a ia keatea mo te Atua. I tena auala ki Sepania, ne fepaki ei a ia mo fakalavelave. Mo taua i te vaaitau nei, ko fano a te faiga malaga a Iona, kae galo mo puli ia Iona te tulaga ka oko kiei a tena faiga malaga. I tona manatu, me ka fanofano lei a tena faiga malaga. Kae poi aka nei, ko fakafeagai a ia mo kaumatagi o te vasa, ke oko ki peau fati o te moana. Sea nei tou lagona mo tau kilokiloga ki te tala o te toeaina tenei? Ao e tenei a te ata o te faiga malaga tela e aunoa mo te malaga fakatasi mo te Atua, mea nei ko te ata o te faimalaga tokotasi. I nisi fakamunaga, ko te ata o te tagata ne fai malaga o fakataunu tena loto, kae se ko te loto o te Atua, ko tena ikuga la ka maua ne fakalavelave o te auala. E tefea nei te kogaa koga e moe gase ei koe i te fakatinoga ou manakoga? E a ta faiga malaga i te kamataga o te tausaga nei? E uke a galu fati mo kaumatagi o te auala ka fakafeagai mo taua, ako fakamasaua mai kia taua i te aso nei, me se ko Sepania e olo taua kiei, ako Nineva.

Aso lua: 16/07/2019

Tusi faitau: Mataio. 9: 20- 22.

Fuaiupu filifilia. 22b: *“Taku tama, ke nui tou manava! Ko tou fakatuanaki ko ola ei koe.*

Ulu o te aso: “KO FAKAOLAGINA NE TE FAKATUANAKI”.

I te tala ne faitau ne tatou e fai mai, e isi se fafine fakaalofa e tafe tena sua i te taimi leva, e sefululua tausaga, ne tolotolo atu kae patele ki te kapa o te gatu o Iesu mo tena fakamoemoega ke lei a ia. Ne mafuli atu a Iesu kia ia ana muna, a tou fakatuanaki, ko ola ei koe.’ I kona foki e iloa, lei ei te masaki o te fafine tenei. E lavea ne tatou me i te tulaga ne fai ne te fafine tenei, ko te tulaga tela e tapu i tu mo faifaiga faka-Iutaia, sua faitu e se tau mo ia o fakapilipili ki te koga tena e nofo a tino i ei ona ko te tulaga o tena masaki tela e nofo mo ia, tela e fakavasega me lailai. sua faitu e se tau mo ia o fakapilipili ki te koga tena e nofo a tino i ei ona ko te tulaga o tena masaki

tela e nofo mo ia, tela e fakavasega me lailai. Te manatu maluga o te aso nei: A te fakaalofa ko fakaolagina ne te fakatuanaki. Ko tona uiga, me i te tino ne se tau o maua ne ia a te ola, ona ko te kiloga faka tagata i tu mo faifaiga masani, nei ko fakaolagina. Fakaalofa te fafine i ana gasueega ite fiamaua ne ia a te ola. Ne faka-matafatu ei tena loto, ke sae sena auala ke oko atu a ia ki te tokita o tokita, ko te mea ke maua ne ia se faka-filemuuga mai tulaga faigata ko oko a ia kiei. Ana muna, ke patele fua au kiei, e seai se tino ne fai ki te fafine tenei ke fano o faka-patele kia Iesu, kae ko te lagona ko oko ifo ki te fafine tenei, me ko Iesu fua e maua iei ne ia a te ola.

Mo tatou i te taeao tenei, ke moaa e maua ne taua ate fakatuanaki muimui tino, faka masei tino, me se fakatuanaki loi fua tena, kae ke maua ne taua a te fakatuanaki tonu ki a Iesu, me tena a te fakatuanaki e maua ei ne taua a te olaga manuia mo te tokaga malie nei, pela foki mo te ola e se gata mai.

Aso Tolu: 17/07/2019

Tusi faitau: Ieemia. 8: 18-22.

Fuaiupu filifilia. v 22 *“E a, e seai ne vailakau i Kileata? E seai ne tokita i kona? Ai a la e seki fakalei ei a pakiaga o tino o toku fenua?”*

Ulu o te aso: “TE LOTO KO TAGI ALOFA MO TE FENUA.”

Ko lavea ne te pelofeta ki ona mata a te mea tenei ne tupu, tela ko te fakatakavaleega o Isalaelu ne te malo o Papelonia, te fakamaseiiga o te fakai mo te ofaaga o te faletapu ne Nepukanesa, kae maise ei ko te puke fakapagotaaga o tino o te fenua ne te malo o Papelonia. Me ne pefea loa te otia o te loto mo te mafaufau o Ieemia, kae e tau eiloa mo ia o folafola atu te fekau a te Atua ki tino o tena fenua. E se tioa la o tagi te loto o Ieemia i te alofa i tena fenua, ana muna, e a e seai ne vailakau i Kileata? E seai ne tokita i kona? Ai a la e seki fakalei ei a pakiaga o tino o toku fenua? Ao te loto ko tagi alofa mo te fenua. A te tagi alofa o Ieemia ki tena fenua, ona eiloa me i tino Isalaelu, e se lagona ne latou ki olotou loto ate mea se ne fai ne latou, e ui eiloa e nofo latou i loto i te tafeaaga i Papelonia, kae se lagona ne latou a te ‘se o te mea e fai ne latou. Kae fakafesili faeloa latou, tefea nei tou Atua, kai a e se tali mai ei kia tatou? Kai a ko tuku tiakina mai ei tatou penei?

Ko tagi te loto o Ielemia, me i te Isalaelu e se lagona ne ia ki tena loto te ‘se o ia, kae tauanau faeloa ki te Atua, ko tena uiga, kafai te Isalaelu ko se alofa ki tena Atua, ko tena uiga, a ia ko se alofa ki tena fenua. Ko fai fua a te mea e loto a ia kiei, kae tuku fua ei Ielusalema ke pokotia i ona tulaga vaivai, ko seai se kilo alofa ki te fakaalofa o Ielusalema, ako fakataunu fua te mea e loto a ia kiei. E tenei a te kilooga a te toeaina, ne ala ei a ia o tagi alofa ki tena fenua, ea ko seai ne tufuga o te fenua? E a ko se aoga a pasama o Kileata? Ko se aoga te pulukau o te pasama? Kai a ko fakanofu fuafua ei penei a Ielusalema? Te loto ko tagi se sologa mo Isalaelu. Mo taua I te aso nei, e a! se a nei tou lagona, mo tau kilokilooga? E pefea nei tou olaga tautua ki te Aliko? Ielusalema, se igoa fua, ako tena manuia mo tena pokotia, e pogai mai i ana tagata mo ana fafine. Kae a la nei taua? Tautua mo te fakamaoni, tu ke mau takitaki i te Aliko, me ko ia ko te pulupasama o pulupasama, tela ne fakalava i kolokota, ke fakalei ne ia ou pakiaaga, mo oku pakiaaga, kae aumai foki ne ia te manuia mo te filemu ki ta olaga nei ki te se gata mai. E tenei a te kilooga a te toeaina, ne ala ei a ia o tagi alofa ki tena fenua, ea ko seai ne tufuga o te fenua? E a ko se aoga a pasama o Kileata? Ko se aoga te pulukau o te pasama? Ka ia ko fakanofu fuafua ei penei a Ielusalema? Te loto ko tagi se sologa mo Isalaelu. Mo taua i te aso nei, e a! se a nei tou lagona, mo tau kilokilooga? E pefea nei tou olaga tautua ki te Aliko? Ielusalema, se igoa fua, ako tena manuia mo tena pokotia, e pogai mai i ana tagata mo ana fafine. Kae a la nei taua? Tautua mo te fakamaoni, tu ke mau takitaki i te Aliko, me ko ia ko te pulupasama o pulupasama, tela ne fakalava i kolokota, ke fakalei ne ia ou pakiaaga, mo oku pakiaaga, kae aumai foki ne ia te manuia mo te filemu ki ta olaga nei ki te se gata mai.

Aso Fa: 18/07/2019

Tusi faitau: Mataio. 7: 7-12.

Fuaiupu filifilia v 7 *“Akai atu, kae ka tuku mai kia koutou, salasala atu kae ka maua ne koutou, Tukituki atu, kae ka ‘tala mai ki a koutou.”*

Ulu o te aso: “KE NOFOGA MALIE UAEA O TAU TELEFONI.”

I te ata ko lavea ne tatou i te aso nei, ko te ata masani i loto i te olaga, tela ko faipati kiei a te tusitala o Mataio, me kafai e akai koe, kae ka tuku atu kia koe, kafai e salasala koe, kae ka maua ne koe, kafai e Tukituki koe, kae ka tala mai te mataloa kia koe. Te fesili, e akai pefea? E salasala

pefea? E Tukituki pefea? I te tusi o te aso nei, Iesu ko akoako ne ia ona soko, ko te mea ke iloa ne latou o akai, ke iloa ne latou o salasala, ke iloa ne latou o Tukituki. Sa fakatagaa sala, kae sala mo te loto katoatoa, me ka maua ne koe. Tukituki, kae ka tala atu kia koe. I te kilooga i konei a te tusitala, me seai se tino e sona ulu kite fale e aunoa mo te iloa mai, io me aunoa mo te Tukituki o te mataloa. Kafai e seai se loto finafinau, e seai foki se loto mau o Tukituki, ka se maua foki ne koe, ko tena uiga, a te uaea e soko ne ia au fakatagi kite tamana, e se lei. Ko tena uiga, kafai e talitonu, fakatuanaki koe mo au mo te fakamaoni ki te Atua, ka maua ne te olaga manuia mo te filemu. Akai atu ki te Aliko mo tou loto talitonu katoatoa, salasala atu ki te

Aliko mo tou loto fakamaoni, tukituki atu ki te Atua mo tou loto fakatuanaki, me kaa tuku mai ne ia kia koe, kaa maua ne taua mea e manakogina mot e manuia o te olaga.

Aso Lima: 19/07/2019

Tusi faitau: 1-Samuelu.17: 31- 40.

Fuaiupu filifilia: v 32 *“Tou malu, e seai se tino e tau o matakū ki te Filisitia tenei! Tuku mai ke fepaki maua.”*

Ulu o te aso: “SAMANAKI KI TOU KAI FAKASALASALA.”

Ne lauiloa a Saulo i tala fakasolopito o Isalaelu, kae pasaa foki ana tala me se toa lauiloa, kae mapu kiei tino Isalaelu i aso o te faigata. Kae sautalagina faeloa ne tupulaga gasolo o Isalaelu a tala o te toa takutakua o Isalaelu, ko Saulo. Kae i te tusi faitau o te aso nei, tenei koi loto te kau fai vaifano mai petelema, se tausi mamoe tela e gata loa tena iloa i mea tau manu, se tama loa e nofo i te vao, e se masani ki malae o taua, kae ne tata tena kai fakasala I malae o taua. Ko i loto nei a Tavita i malae o tagata, te koga ka fai ei a faiva o tagata, ako agatilo atu la nei a Saulo ki titigavae mai petelema. Ko titigavae mo takapilipiliga a Tavita, ko ala ei o matemate gata ia Saulo a te tamataene tenei, aua me koi foliki fua, kae pefea loa o fakanafa atu kia Koliata, tela se toa loa mai te folikiiga, se tagata e apo i malae o toa, se tagata e lauiloa i ana tulakiiga i loto i malae, se tagata e agatilogina i loto i malae. Sea nei te mea ko tupu? Ko iku faigaa mea, ko siga talatalafale o filisitia, ko moe i lalo a toa masani o malae, ko tata te kai fakasalasala o te tamataene mai petelema. Ko uaate valevale te kautau, ko oko atu foki te uaate tenei ki toaina mo te fenua katoa. Kae mai i

tulaga konei, ne fakafesili ei a Saulo, Apinelu ee ai te tama tenei? Te tali a Apinelu, tou malu e se iloa ne au. Ko matemate gata ia Saulo a titigavae o peteleema, ko fia iloa nei ne Saulo me ko oi a matua o te tamataene tenei.

Ko maaea nei a tala fai o te malae, tela ne fesili atu ei a Saulo kia Tavita, ko oi tou tamana? Ne tali atu Tavita, tou malu, a toku tamana, ko Iese tau tavini, se tagata mai peteleema. Te atufenua pele Tuvalu, ola mafuta ki te Aliko i tou olaga, piki lima fakatasi mo te Aliko i aso o tou olaga, me ka manuia kae solosolo lei ei te olaga, ki te se gata mai.

Aso Ono: 20/07/2019

Tusi faitau: Mataio. 19: 27- 30.

Fuaiupu filifilia. v 27 *“Muna Petelu kia a Iesu, “Kiloke, ko tuku ne matou omotou mea katoa, kae tautali atu ia koe. E isi la se mea e maua ne matou?”*

Ulu o te aso: “TE LOTO SE MAUTINOA, KO PUKE TU NE TE LOTO SALAMO.”

I ata gasolo o te olaga, e lavea ei ne tatou te ata o te tiute e fai mo te iloa tonu, mo te tiute e fai mo te se iloa. A te tino e fai te tiute mo te iloa tonu, ka fanofano lei, kae e iku foki ki te manuia, ako te tino e fai ne ia te tiute mo te se iloa tonu, ka se fanofano lei a te faiga o te tiute, kae ka tuku taumate faeloa ne ia a tena tiute fai, me lei io me se lei. A te sautalaga a Iesu mo te tagata maukoloa, e fakatupu ne ia te loto poipoi mo te se toka o Petelu o talia a te faipatiga tenei, ko se toka a te loto o Petelu i te lagonaga ne ia a te pati a Iesu ki te tagata maukoloa penei, fano o ‘fakatau atu au koloa katoa, tuku atu a tupe ki tino mativa, kae ka maua ne koe a koloa e uke i te lagi, ko vau ei koe o tautali mai au. Konei a fakamunaaga ne safe ei a te loto se toka o Petelu, tela ne fakafesili ei ne ia a Iesu. I loto i te fesili a Petelu tenei, e lavea atu ei me i a ia e seki fakamoemoe ki koloa i te lagi, kae ne manako e iloa ke na lavea ne ia a te tau i tena tautali. I te tali a Iesu, e atagina mai ei me ko te Atua e iloa ka avatu ne ia te tau i te tino e tusa ei ko mea ne fai ne ia, io me ko galuega ne fai ne ia, i te fakapuli o ia ne ia e iloa, kae tautali atu kia Iesu. Ko tena uiga, te tagata ko te galue fua ako te tau i mo sui e a te Atua. E se lavea atu me pefea te lasi mo te maluga o te salamoo ne oko kia Petelu, kae i loto i tena faipatiga e lavea atu ei a pati a te tino e se mautinoa tonu a tena tulaga tautali, kae e pela me se tino ne fano fua i tino e olo. Muna Petelu, te Aliko ko tuku ne matou a

mea katoa, ako omai matou o tautali atu ia koe, e a? e isi la se mea e maua ne matou? Kalofa te loto se mautinoa, me ka faite ne ia a te auala foki o ia ki tua. Tautali mo te mautinoa, tautali mot e loto katoatoa, ka lavea ei ne taua fakamanuiaga mai te Atua.

Aso Tapu: 21/07/2019

Tusi faitau: Luka.15: 11-20a.

Fuaiupu filifilia. v 22 *“Ka ko kalaga te tamana ki ana tavini, ana muna: Fakavave aumai te gatu sili i te ‘lei o fakapei ki a ia. Faulu se mama ki tena maikao kae fakataka ona vae.”*

Ulu o te aso: “KO TE FAKATALA A TE TAMANA.”

E masani faeloa tatou ki te mea tenei ki te fakatala. I te masani o lavea ne tatou te faifaiga tenei i luga o tou fenua, ma na fai e isi ne galuega lasi e fai i tou fenua, e masani faeloa o fai a te tafaoga tenei. Kafai e faite te faletapu, i taimi e ligi ei tena fakavae, masani tou fafine o fakatala ne latou a te galuega, ke oko ki te tukiiga o te kaapa, e masani foki o fai i kona a te fakatalaaga. I te tala o te aso nei, ko manako te tamaliki ki tona vaega, ke lavea aka ne ia me pefea nei te tulaga o te lalolagai mo tena gali, ko manako te tamaliki ke sala matagi atu a ia ki se koga tai mao atu. I taimi ne malaga atu ei te tamaliki tenei, ne kamatomata ei o sousou a te tai, ke oko e iloa ki te taimi ko afatia ei a te olaga o te fanau tenei. Ko tapeapea nei te olaga i loto i se tulaga faigata, i se tulaga e fakaalofa, ako fakalaa nei ona taliga ki se au e tokagamalie ei te olaga. Ne oko mai ei a mafaufauga lei, mo te gali, kia ia penei, kai a e ola fakaalofa ei au penei? A tino galue a toku tamana e kai makona faaeloa, kae tenei au e likiliki faaeloa, au ka tu ki luga, o foki ki toku tamana, kae fai atu kia ia penei. Au ko se ki te Atua, e pena foki kia koe, ko se tau au o taku ko tau tama, kae ke fai au mo au tino galue. Mea nei ko te ata o te tino, ko seai se mafutaga ki te tamana, ko te ata o te tagata ko se fia mafuta ki te tamana. Tenei te ikuga o te olaga manafai ko mao taua mo te Atua. Kae a te ata o te foki maiga a te fanau tenei? Ao ne fakatala ne te tamana tenei ki se gatu fou, faulu se mama fou, fakataka ona taka fou. Ao ko te fakatala a te tamana. Iesu ko te katoatoaga o te fakatala a te Atua e sao ei koe mo au mai mea faigata mo fuifaiga o te olaga nei, ko ia tena ne vau ke futi aka ne ia taua mai te masei o te olaga, kae ke maua ne taua se olaga fiafia mo te tokaaga malie.

Ulu o te Vaiaso: “Ke fakaafe te alofa o te Aliko i tou olaga”

Aso Gafua: 22/07/2019

Tusi Faitau: 2 Tupu 4: 8- 16

Fu'aiupu Filifilia; 10: *“E lei ke faite se potu foliki i luga, kae avatu ki ei se moega, se taipola, se nofoaga mo te moli.”*

Ulu o te aso: “Fakaafe te Atua ki tou kaiga”

Te fafine sunema i ana aofaga, ne aofaga ne ia se fakatokaga e fakaafe ei ne ia te tagata o te Atua, tela ko te Pelofeta ko Elisaia. Se fakamoemoega ne mafua ake i tena talitonu me ia Elisaia se tino malu, ko tena uiga se taumate, ne molimau ne te fafine maumea mai sunema ne faifaiga fou i loto i te mafutaga a laua mo Elisaia. Kae ko tena aofaga mo tena fakatokaga, ne aofaga ne mafua mai i tena fakaaloalo ki te tavini a te Atua. Ko tena uiga, e se ko tena fia tautua fua ki te Pelofeta kae ki te Atua foki. Ana muna, ke faite se potu kae tuku atu ki ei se moega, tela ko te fakatusa o tena fakaafe ki te Atua ke fai malologa fakatasi mo ia i tena fale e ala i tena Pelofeta, se taipola, tela ko te fakatusa o te taipola ki te muna a te Atua e fakasoa mai ei muna o te alofa o te Atua e ala i tena Pelofeta, te nofoaga, ko te koga e sagasaga ei te Atua i loto i tena kano fale e fakafesagai ei laua i loto i tena fale, kae maise te moli tela ka fakamaina ei te ala o te tavini a te Atua i loto i tena fale, kae kafai foki mo moli e fakamaina ei ne te Atua a kano fale o tena kaiga. Konei a fakatokaga a te fafine sunema, e fakaafe ei ne ia tena Atua e ala i tena tavini ko Elisaia. Kae mai i tena fakaafega tenei, ne maua ei ne ia se fakamauiaga tafasili i te fakafiafia ki tena olaga mo tena kaiga e ala i se tamaliki. Nea nei au palani mo au aofaga ki tou Atua e ala i tau fakaafega? Mata e tali lei ne koe ki se taliga malo faitama ‘lei? Fakatoka au fuafuaga e ala i tau fakaafega ki te Atua, i lagona o te fafine sunema, kola ne lagona e fakaasi ei a tena loto fiafia mo tena fia tautua mo te fakamaoni ki te Atua e ala i tena tavini ko Elisaia. Kae ka maua ne taua te taua ma sui a te Atua tela ko tena alofa fakafiafia ki tou olaga i aso takitasi. Iesu Keliso, ko te tali katoatoa tena o ana fakamanuiaga mo koe mo au, ko te mea ke maua ne taua te ola e se gata mai.

Aso Lua: 23/07/2019

Tusi Faitau: Filipi 3: 12- 21

Fuaiupu Filifilia; 20: *“A tatou ko tino o te lagi, kae mai te lagi e vau ei a te fakaola tela e fakatalitali tatou ki ei, ko te Aliko ko Iesu Keliso.”*

Ulu o te aso: “Te manakoga o te Aliko, ke takua taua ko ana tamafanau, e ala ia Iesu Keliso”

Paulo i te taeao tenei ko taumafai o fakaokooko atu ki Kelisiano talitonu i Filipi, a se fakamasauaga ona ko te fakamataku o faifaiga faka Iutaia kola ko taumafai o fuli a te olaga talitonu o latou. Paulo ko toe fakamanatu atu ki taina Kelisiano katoa ke tumau kae fakamalosi a olotou olaga soko tasi ki te Atua e ala i te olaga fiafia faka-te-Agaga. Ke fakamuamua foki ia latou a te olaga tavini atu ki te Atua e ala i te olaga tautua i loto i tena Tala ‘Lei, kae fakamulimuli te olaga faka-te-foitino. Ne seki taumafai a Paulo ko te mea ke tiakina te olaga faka-te-foitino, kae ko e taua ko te fakavasegaaga o olotou mea fai ke fakamuamua te Atua e ala i te olaga faka-te-Agaga. Te fakamanatuga tenei a Paulo, ko te taumafaiga ke taku atu ki ona taina Kelisiano katoa i Filipi, ki faifaiga e tau ke olagina ne latou e takua ei latou ko tamafanau a te Aliko. Ko tena uiga ko latou ko tino o te lagi kola ka fakaolagina e ala i a Iesu Keliso. E talitonu te loto o te apositolo me se tulaga faigata ke olagina ne ona taina Kelisiano i Filipi, kae ko taumafai Paulo o toe fakamalosi atu ki a latou, ona ko te malosio o faifaiga faka Iutaia kola e fakavae mai i te tulafono mo ‘tu mo aganu faka Iutaia. Ko Paulo ki taina Kelisiano i Filipi, ko Paulo foki ki a tatou i te taeao tenei, se fekau e toe ‘fagu kae fakamanatu mai ki a tatou, ko tatou ke tumau o ola i se mafutaga kau fakatasi mo te tou Aliko, ko te mea ke takua tatou ko tino o te lagi, ko tamafanau a te Atua, tela ka fakaolagina ei tatou e ala i a Iesu Keliso. Kae e pefea la o maua ne tatou se fakalupega penei, ko tamafanau a te Atua? E pefea o fakalupegina tatou ko tino o te lagi? Na ko te tumau o talitonu kae fakatuanaki, tautua mo te Agaga ‘katoa i loto i tena Tala ‘Lei, fai te mea e loto ki ei te Atua, kae ka takua koe se tamafanau a te Atua, kae se tino foki o te lagi, e ala i a Iesu Keliso. Tena mate mo tena toetu manumalo, ne katoatoa ei a tou takua ko tamafanau a te Atua, manafai e tumau atu tatou ki a Ia i te agaga o te talitonu mo te fakatuanaki.

Aso Tolu: 24/07/2019

Tusi Faitau: 1 Kolinito 10: 18- 26

Fuaiupu filifilia; 21: *“E se mafai o inu koutou ki te ipu a te Aliko, kae toe inu foki ki te ipu a temoni, e se mafai foki o ‘kai koutou i te laulau a te Aliko, kae toe ‘kai foki i te laulau a temoni.”*

Ulu o te aso: “Te filifiliga ke tonu, me ko te Aliko, me ko temoni.”

Ka tonu te filifiliga, e manuia foki te olaga, kae kafe e seke a tau filifiliga, e fakalofa foki te olaga. Te tamana mo te matua, e aofaga ‘mo se ‘lei o fanau, a takitaki o kaiga, fenua, te malo ke oko ki te Ekalesia, e aofaga kae ata filifili fakalei, ko te mea ke maua se manuia. E atagia i te tusi faitau o te taeao tenei, ko te fakamanatu a te apositolo ko Paulo ki Kolinito ko te mea ke faeteete latou mai tupua, ko tena uiga e taua ko te filifiliga, me ko tupua io me ko te Keliso Toetu. I niisi fakamunaga, ko te ola io me ko te mate, aua me i te filifiliga e taua ki te tagata, aua me ka tonu a tena filifiliga ko te manuia tela ko te ola. Kae kafe ko pasalagina te filifiliga ko tena uiga ko te malaia tela ko te mate. Kae iloto i te olaga mafuta i Kolinito, tupua ko fai mo fakalavelave ki olaga talitonu o tino, te vaega tenei ko faipati ki ei Paulo, e fakauigagina i Kolinito me ko faiga tapuakiga vavevale kola e autu tonu ki atua faapaupau. Ko tena uiga, ko taumafai te apositolo ko Paulo, o taku atu ki a latou me se mafai ne latou o tapuaki atu ki vaega atua faapaupau konei, kae tapuaki atu foki latou ki te Atua. Aua me se faifaiga e se tonu. Ko tonu ei muna a fai Evagelia, me e se mafai ne se tino o tapuaki ki Atua e lua i te taimi e tasi, aua me alofa ki te isi, kae se alofa ki sua isi. Tela la, ko te filifiliga ke tonu, me ko te ola io me ko te mate.

Ko te fekau a Paulo ki Kolinito, ko te fekau foki tena a Paulo mo tatou i te taeao tenei, kae ko te fesili, e fia nei atua kona e tapuaki koe ki ei? Ko fia nei tupua i tou olaga kola ko pologa ko koe ki ei? Te kalaga o te taeao tenei, tau filifiliga ke tonu, aua me ko te ola mo te mate ei tau filifiliga. Taina i te taeao tenei, ko te Aliko ke fakamuamua, kae se ko au tupua kona, e inu ei fanau mo ou mokopuna a te vine kona. Iseu Keliso, ne seki filifili ne ia a tona nofoaga tupu, kae ne filifili ne ia te ulu mauga o Kalevalia, ona ko tena alofa ki a koe mo au, Tuvalu kae kaia la e fiafia ei koe ki tupua mate o te olaga nei? Ke tonu a tau fakaafega, e manuia ei fanau.

Aso Fa: 25/07/2019

Tusi Faitau: Maleko 5: 25- 34

Fuaiupu Filifilia; 28: *“I tena manatu, “Ko au fua ke patele atu ki te gatu o Iesu, ko ‘lei ei au.”*

Ulu o te aso: “Fakaafe te Atua i ou manatu e ola ei koe.”

Manatu o te fafine e tela ne masaki i se leva e sefulu lua tausaga, koi a fua ke patele ki te gatu o Iesu. Kalofa i lagona o te fafine, ne lagona mo manatu e atagia ei te fiaola. Aua ka fua ki te sefululua o tausaga e se se taimi toetoe. Kae se manakoga e tela ne mafua i te fiaola, kae kalofa i ona manatu, aua me fakalava mai i ona mua, ko ‘tu mo faifaiga o ona vaitau kona, kola kafai mo fakalavelave i tona agai atu ki a Iesu. Se gata i ei, kae ke oko foki loa ki tena tulaga e pela me se fafine, se tulaga e kilo maualalogina i vaitau o te sosaiete i ona po kona. Kae ui a fakalavelave konei, kae ne seki foki te loto mo te naunauga o tena loto, ko i a fua ke patele atu ki te gatu o Iesu. Kalofa i ana taumafaiga, ne taumafaiga kola ko atagia ei a tena loto ke fakaafe aka tena masaki ki te gatu o te tokita o tokita, tela ko Iesu Keliso. Ko tonu a tena manatu, ko tonu foki a tena akasakiga, ne iku ei mo te manuia a tena masaki. Muna Iesu i te fuaiupu e 34, *“Taku tama, ko tou fakatuanaki ko ola ei koe.”*

Te taeao tenei mo tena fekau fakamanatu, fakaafe te Atua i ou manatu mo au fuafuaga e ola ei koe. Te fafine ne masaki i te sefulu lua o tausaga, kae ne taumafai e iloa ke fakaafe atu ki te Alike a ona manatu mo ona mafaufauga, kae ne ake aka ei a tena masaki ki alofilma ‘mana o te Keliso Toetu a te Atua. Ko tona uiga, fakaafe atu te ola ki tou olaga tela ko Iesu Keliso, kae sa fakaafe ne koe a fakalavelave mo fuifaiga o te olaga, e fai ei mo fakalavelave ki tou olaga. Iesu Keliso ko te Tama a te Atua, e tela ne fakaafe ne ia koe ki ona alofilma atafai tama, ko te mea ke ola koe nei ke oko atu ki te se gata mai, e ala i tena mate mo tena toetu manumalo.

Aso Lima: 26/07/2019

Tusi Faitau: Luka 6: 46- 49

Fuaiupu Filifilia; 47&48: *“Ko te tino e vau ki a au kae fakalogo ki aku muna, kae fai ne ia, ka fakaafe atu ne au te tino e pau mo ia. 48; E pau a ia mo se tagata ne faite se fale, ne keli ki lalo i te papa, kae ne faite te fakavae i luga i te papa. Ne lofia te vaitafe, kae ne oko te vai ki te fale tena, kae ne seki mafai o gasue te fale, me i te fale ko nofoga malie tena faitega.”*

Ulu o te aso: “Fakaafe te Atua ke fai mo lafiga e nofoga malie ei te kaiga”

Te tufuga faite fale ko aumaigina ne te Evagelia ko Luka i te taeao tenei, e pei mai ei te ata o te tagata e isi ne ona taliga, kae ola o fakatino i tena olaga. Se tufuga e tela e lagona ne ia a muna a

te tufuga o tufuga kae fai ne ia i tena olaga, tela ne fepakipaki mo fuifaiga o te olaga nei, kae ne seki mafai o faka-gasuegina, aua me ko te tufuga o tufuga ko fakafoe ne ia a tena olaga. Te lofiaga o te vaiatafe tela ko fakatusa ne te tokita ko Luka i te taeao tenei ki fuifaiga mo fakalavelave o te olaga nei. Kola ne taumafai o fakamasei ne latou te fale o te tagata faite fale, kae seki mafai o gasue ona me fakavae i luga o te papa ko Iesu Keliso. Tenei te ata o te tagata e tela e ola o fakavae a tena olaga ki te Aliko ko Iesu Keliso, e se mafai o lueluegina manafai ko fepaki mo fakalavelave, e 'toka faeloa te olaga ona ko Iesu Keliso ko te fatu taula o tena olaga. Tela ne fakaafe ki ei te fakavaega o tena kaiga, kae ne nofogamalie ei te olaga.

Tatou i te taeao tenei, se fekau e toe fakamasaua mai ki a tatou me ia tatou ko tufuga faka'nagina o kaiga, ko tena uiga, fakavae te kaiga ki te papa o papa, fakaafe te Aliko i au fakatokaga e malu ei te kaiga i fakalavelave o te olaga, sa faka'na ki tou iloa e pela me se tufuga masani o te olaga nei, e fakalofa ei te kaiga, kae sili ke fakavae kae fakaafe atu a tau toki fakatakitaki faka matai, ki te Aliko ko Iesu Keliso, e manuia kae malu puipuia ei te kaiga. Iesu Keliso ko te papa o papa, e tela ne ofa ne ia te fakamataku o te tugamau, ke ola koe ke ola au, kae ke fakavae atu te olaga malaga ki ona lima, e tokagamalie ei te kaiga, Fenua te malo kae sili ei ko tena Ekalesia.

Aso Ono: 27/07/2019

Tusi Faitau: Luka 14: 25- 33

Fuaiupu Filifilia; 27: *“A latou kola e se amo olotou sataulo, kae se tautali mai i a au, e se mafai o fai a latou mo oku soko.”*

Ulu o te aso: “Amo kae kopi a tau fakalofa”

A te fai mo soko i te olaga o se tagata, e se se mea e faigofie. A te fai foki mo soko, ko oko eilola i te faigata ki te olaga o se tagata ola. Aua me i te ola se fia pulea o te tagata, ko te natula fakafoe tena o te olaga malaga o sose tagata ola. Te tokita ko Luka ko aumai ne ia te ata o te faigata o te fai mo soko. Se tulaga e tela e fui fakamasani ki ei te olaga o te tagata, aua te loto e avefaeloa ne te olaga nei mo ona galiga. Te loto mo te olaga e pulea faeloa ne lagona o te loto masei mo te fakamsei tino, ko tena uiga te olaga mo te natula o te tagata ola kooti eilola ne teuteugina ki te masei. Muna Iesu i te taeao tenei, “latou kola e se amo olotou sataulo, kae se tautali mai i a au, e

se mafai o fai a latou mo oku soko.” Kalofa i fakamisimisiga a te Aliko ko Iesu, aua me ko leva ne iloa ne ia te se fia toilalo o te tagata, ko te mea ke lagona ne ia a tona ‘se tela ko tena sataulo, kae tautali atu i ona ala filemu kae alofa. Kae ko te fakamanatu o te taeao tenei, kopi a tau fakalofa, ko tena uiga fakaakoi aka a tou Fakaola ko Iesu Keliso tela ne fakalofa i au mo aku faiga ne fai, kae ne fakatoka ne ia a tou manuia e ala i tena sataulo. E faigata i te tagata o talia ne ia ke amo a tena sataulo, e faigata foki i te tagata o tautali atu ia Iesu Keliso, kae ko te fakamanatu o te taeao tenei, fakaakoi aka te alofa ke ola ia koe, kae ka mafai ne koe o talia o amo tau sataulo kae tautali atu ia Iesu keliso. Ola o fakaakoi aka te Keliso, ola o amo tau sataulo, kae sa ola o fakaeke atu tau sataulo ki niisi, aua me ia Iesu Keliso ne seki fakatafa ne ia te mafa mo te faigata o tau sataulo ne fau, kae ne amo ne ia ki te okoga o tena ola, ke fai ei mo akoakoga kia koe mo au, ko te mea ke ola taua o amo o ta sataulo, kae ka maua ei ne tatou a te ola e se gata mai.

Aso Sa: 28/07/2019

Tusi Faitau: Fakaasiga 2: 1- 7

Fuaiupu Filifilia; 4: *“Kae tenei e iloa te mea ko se malie ei au ki a koe, i a koe ko se alofa mai nei ki a au e pela e iloa mo tou alofa i te kamataga.”*

Ulu o te aso: “Sa tualimagina te alofa fakatoka o te Atua mo koe”

Ioane i tena fekau fakamanatu ki Efeso, se fakamanatu e toe ‘fagu ei te olaga talitonu kae fakamoemoe ki te Atua mo tena alofa. Efeso se tasi o laufanua iloga i loto i Asia Foliki, ona ko tena taulaga vaka, ke oko ki tena laukele, kola e uke a atiakega e fakatele i ei, kae mai i tulaga o te taua o tena laukele, ko te mafuaga foki tena o tokouke a tino valevale e malaga atu ki ona laufanua. Kae mai i te uke o tino valevale i tona laukele, ko te uke foki loa tena o vaega talaiga kesekese kola ko solo atu mo latou. Kae mai i te uke o talitonuga kesekese, ko fai ei mo avega ki Efeso. Tela, ko kamata ei te ola fulitua, ko tena uiga, ko pulepule te olaga talitonu o te Efeso i mua o te Atua. Kae tenei e iloa te mea ko se malie ei au ki a koe, i a koe ko se alofa mai nei ki a au e pela e iloa mo tou alofa i te kamataga. Ko tena uiga, Efeso ko se alofa ki te Atua e tela ne fakavae ne ia a tona olaga talitonu mo te ola tapuaki atu ki te Atua. Ko tena uiga, Efeso ko kapaeva, Efeso ko fulitua, ko galo te agaga fakaafe ia Efeso ki te alofa o te Atua. Ma ko te fekau ‘fagu foki tenei mo tatou i te taeao tenei, aua me i te olaga o Efeso, ko te olaga foki tela ko solo faka-afi i luga i tou

atufenua. Se olaga e fultua gofie ki te Atua. Ko uke a talaiga fou i tou laukele, ko uke foki a faifaiga fou ki luga i tou atufenua, kae ko kamata te Tuvalu o muliselu mai ki te Atua o ona tupuga, te Atua e tela ne fakatakato ei ne ou tupuga a muna tapu o tou Fakavae, “Tuvalu mo te Atua, te Atua mo Tuvalu,” Tuvalu e tefea nei a tou alofa i aso taumua ki te Atua, e tela ne puti ake ne ia a koe Tuvalu mai i te seai ki te isi? Kaia ko mamasagia ei ia koe a tou Atua? Ko te fekau fakamanatu la mo taua i te taeao tenei, Tuvalu, toe fakaafe ake te Atua mo tena alofa e pela eiloa mo te kamataga, toe faka foki aka Tuvalu ki ona tala iloga i tou takutakua, ona ko tou ola tautua ki te Atua. Aua me ia koe ne seki tiaki ne te Atua, kae ne tuku mai ne ia a tena tama ko Keliso, ke mate kae ke toe ola taua o fakatino te alofa taumua o taua mo ia.

Ulu o te Vaiaso: “Taofi la ke mau a tou Atua, i tou olaga ‘katoa.’”

Aso Gafua: 29/07/2019

Tusi Faitau: Ieemia: 1- 9

Fuaiupu Filifilia; 1: *“Aku muna eiloa i toku ulu se vaikeli e fonu i te vai. Mo oku mata se punavai o loimata, ko te mea ke mafai ne au o tagi i ao mo po ona ko te tamatega o oku tino.”*

Ulu o te aso: “Ko loimata alofa o te ola mafuta ‘mo te Atua.’”

Te Pelofeta ko Ieemia, tela e fakaigoagina me se Pelofeta mata tagitagi, ko tena uiga e mafai o takuagina a ia, me se Pelofeta e ‘seva. Kae ko te afuaga o te ‘tagi o Ieemia, ona me ia ia ne maimoa mata eiloa ki te tulaga faigata ne oko ki ona tino, i te taimi ne ave ei faka pagota a ona tino ki te tafeaga. E setioa la o tagi te Pelofeta, e setioa foki o fakamunagina ne te Pelofeta me i tena ulu e pela me se vaikeli e fonu i te vai, mo ona mata ne punavai o loimata, ko tena uiga, se mafatiaga e se faigofie, se mafatiaga e tela ko se ‘toka ei te loto o te Pelofeta. Kae ko te vaega taua i konei, ko te atagia o te alofa o te Pelotefa, se alofa e tela ko fakasoa atu ki te Atua e ala i ona loimata, ko te mea ke toe fakatoka aka a ona tino. Ne loimata o te tagata e alofa tonu ki tena fenua, ke mo a e fakalumagina. Aua me i te tafeaga, e se faigofie, te tafeaga e tala mai ei a tala o te agasala mo te faivalevale o tena fenua, kae konei ko loimatagina ne te Pelofeta ko Ieemia. Ne loimata e taku atu ei ne ia ki te Atua, a tena loto mo tena fakamoemoega, ko tena uiga ne loimata o te mautinoa ki tena Atua aua me iloa ne te Pelofeta, na ko te Atua fua e maua ei se tokaga filemu ki ona tino.

Ko tena uiga, ne loimata, e taua ki a koe mo au, ne loimata kola e tau ke akoako ki ei te olaga o taua, ke iloa ne taua o fakamuamua atu a ta loimata ki te Atua ‘mo se fakatokaga e tokaga malie ei te atufenua. Loimata ki loimata o te Pelofeta ko Ielemia, aua me ne loimata e fakatagi atu ei a ia ki tena Atua ‘mo se fesoasoani aua me i te loto e alofa. Sa loimata ki loimata e se aoga, kae lakei atu te loto ki te alofa, e loimata atu ei ne koe a loimata o te alofa tonu ki te Atua ‘mo niisi. Konei a loimata o te tagata ola mafuta mo tena Atua, se tagata e tela ne taofi mau ki te Atua o ona tupuga, ne loimata atu ei ne ia a ona loimata mafatia ona ko ona tino. Iesu Keliso, ko loimata alofa o te Atua mo koe mo au, ke maua ei ne taua te ola e se gata mai.

Aso Lua: 30/07/2019

Tusi Faitau: Ioane 5: 1- 8

Fuaiupu filifilia; 6,7&8: “**6;** *E fia ‘lei tou masaki?* **7;** *Te Aliko, e seai e iloa ne tino e tuku ifo ne ia au ki te vai ma ‘lepu, ka koi fanaifo au, ka ko mua ifo te sua tino i a au,* **8;** *‘Tu ki luga, puke tou moega kae fano.*”

Ulu o te aso: “Fakafou aka a tau gasue ‘mo te Atua.”

Te olaga sefemuli ko ola kae ko fai valevale i te tagata masaki tenei. Se olaga e ola faka’na fakalagolago, kae ko seai e iloa se ana taumafaiga e fakataunu ei a ona fakamoemoega ke ‘lei a tona masaki. Lagona o te fialei, kae ko te loto e vaivai, lagona o te fiaola kae e fakamuamua a tona ola fakalagolago ke fai ne se tino ki a ia. Muna Iesu ki te tagata masaki tenei; “E fia ‘lei a tou masaki?” Toe itiiti ko tali atu a Iesu, kae kooi e faka’na koe ki ei? Lavea ne Iesu te olaga paie mo te olaga fakalagolago e tela ko fai mo fakalavelave ki te manakoga o te tagata masaki. Ana muna; “Te Aliko, e seai e iloa se tino e tuku ifo ne ia a au ki te vai ma ‘lepu, ka koi fanaifo au, ka ko mua ifo te sua tino i a au.” Ko tuku aliali mai te ata sau katoa o te tagata ko seai e iloa a sena fakatokaga mo sena aofaga, ke mafai ei a ia o mua. Te olaga fakapalapala, se olaga e tela ko fakamuamua i manatu mo lagona o te tagata masaki tenei, ko tena uiga, e fialei, e fiaola kae e se katoatoa a tena loto ki ei. Mo tatou i te taeao tenei, e tenei foki te natula masani o te tagata ola i tena olaga, se olaga e ola kae fakalagolago ki tena paie, se olaga e fakamuamua a tena loto vaivai, se olaga e fakamuamua te talimuli e fai ei mo fakamasakoga. Kae ko te fekau o te taeao tenei, fakafou ake a tau gasue ‘mo Aliko, fakafou ake a tou olaga paie ki se olaga e gasue kae taumafai atu ki te ola e

tela ko te Aliko ko Iesu Keliso. Aua me e seai e iloa se mea e mafai o maua ne taua manafai e ola te paie mo te ola fakalagolago ki niisi ke fai ne latou mo koe, kae sili ke tu koe ki luga kae fano ki te Aliko, tu keatea mo tou olaga paie kae fakalagolago ki niisi kae sili ke tu koe ki luga kae fano tonu e iloa ki te Aliko ko Iesu Keliso e tela ko i a ko te ola mo te filemu.

Aso Tolu: 31/07/2019

Tusi Faitau: 1 Tupu 21: 1- 5

Fuaitupu Filifilia; 3: *“Ne tali atu Napota, “A te to’ga vine tenei se to’ga vine e iloa mai oku tupuga. E se mafai ne au o avatu ki a koe.”*

Ulu o te aso: “Taofi mau ki tou to’gavine mai i ou tupuga.”

Mai i te gali o te lausiusi mo te ola gali o te to’gavine a Napota ne avea ei a mata o te tupu ko Aapo. Kae mai i te avea o ona mata ne manako ei a tona loto ke puke ma ia a te to’gavine tenei. Kae mai i tona manakoga, ke oko ki ona manatu me ka faigofie ia Napota ke tuku atu ma ia, ona ko i a se tupu. Kae lilo i te tupu a te tali ka tuku atu ne Napota ki a ia. “Te to’gavine tenei, se to’gavine e iloa mai oku tupuga. E se mafai ne au o avatu ki a koe! Napota mo ona lagona alofa ki fakatokaga a ona tupuga mo ia mo tena kaiga e ala i te to’gavine, ne lagona ne seki mafai ei ne ia o tuku atu ki te tupu, kae ne taofi mau e iloa ne ia. Aua me i tala o te to’gavine, ne tala o te ola kola ko fakatokaga o ana tupuga mo tena taeao manuia. Se kinaga e tela kafai mo ola ki tena kaiga, ne seki mafai ei ne ia o tuku atu ki te tupu kae ne taofi mau e iloa ki tena to’gavine mai i ona tupuga. Te ata o Napota, se ata o te tagata e tumau kae mautakitaki o tausi kae taofi ki fakatokaga a ona tupuga, ne seki manatu mama a Napota ki fakatokaga a ona tupuga, kae ne fakaakoi ne ia. Ko tena uiga Napota se tagata e iloa o kaiga, se tagata e iloa o fenua, aua me i tala o tuku’ga muna o kaiga ko muna foki kona o fenua, ko muna o tena manuia e ala i te ola mai i tona to’gavine.

Ko tena uiga, se fekau e taua mo tatou, ko tatou ke ola o tausi a fakatokaga a tou tupuga e ala i te to’gavine fakatoka e tela ko te Tala “Iei. E tenei a tau to’gavine, e tela ne fakatoka ne tou tupuga e maua ei ne taua te ola filemu mo tena manuia. Taofi mau ki tou manuia, sa tuku atu a tou manuia ki lima o niisi kae sili ke taofi mau koe ki ei. Aua me ko te Atua fua ko te to’gavine fakatoka tena, tela ne alolimagina ne o tou tupuga ne manuia ei taua.